



Iader & Albanus quoque ex patria sua proficiscientes unâ cum Tuiscone exules in Europam uenerunt, atq; Germaniam & finitimas regiones occuparunt. ubi cum strenuè operam nauassent, Tuisco ipsis Liburniam & Illyriam Italiæ proximas regiones assignauit, quas hodie Germani Veneticam Marchiam nominare solent. Propterea ab iisdem suis conditoribus Iadera Colonia, atque Albanenses populi à Plinio enumerati extiterunt. Hos etiam postea Seruius ex Horatio, Rhetorum Vindelicorum partem constituit, atque ex Amazonibus, ob gentis ferociam, originem suam traxisse asseuerauit. cum tamen hi Tuisconis comites eos fundarunt, & memoriæ suæ monumenta iis in locis reliquerunt. Berof.